

МЕСЯЦА ИУНИА В 10-Й ДЕНЬ.

СОБОР СИБИРСКИХ СВЯТЫХ

НА МАЛОЙ ВЕЧЕРНИ

На Господи, воззвах: стихиры на 4, глас 8:

Приидите, православных собори, * воспоим святых, в земли Сибирстей просиявших, * учением к Богоразумию нас наставлявших, * источники чудес предивных, * Церкви светильники пресветлыя * и всяя России удобрение. * Тии бо избавляют нас от всяких злых искушений и бед * и молятся о душах наших.

Сибирския земли иерархов песньми воспоим: * от нихже Димитрия, Иоанна, Филофея, Павла – Тобольских, * Иннокентия, Софрония и Мелетия – Иркутских, * апостола Сибири Иннокентия Московскаго, * и все пастырское сословие приводим в молитву, * ихже ради спаси, Христе, души наша.

Добрии раби, блазии и вернии, * и добрии делателие винограда Христова, * вы тяготу дневную понесли есте * и данный вам талант возрастили есте, * темже и дверь Небесная вам отверзеса, * внидите в радость Владыки Христа, * молящеса о нас, святии наши учителя.

Слава, глас 6:

Человецы Божии и вернии раби, * служителие Господни, мужие желания, * сосуди избранныи, * столпы и утверждение Церкви, * Царствия наследницы, * не премолчите, еже о нас вопити ко Господу.

И ныне, Богородичен, глас тойже:

С преславными чинми Ангельскими * днесь, вернии, духовно веселимся, * светло празднующе пресветлое торжество Богоматере, * Юже пречистый Ея образ, * яко источник приснотекущий, явися, * исцеления независтныя дары присно источающ.

На стиховне стихиры, глас 2.

Подобен: Доме Евфрафов:

Дом и жилище * Духа Пресвятаго * святии вси, в Сибири просиявшии, были есте, * темже и нас дом Того соделайте, * святую вашу память почитающих.

Стих: Честна пред Господем * смерть преподобных Его.

Граде Тобольск, * земле Сибирская, * красуйся и ликуй * собором Сибирских святых, * ныне благочестно нами прославляемых.

Стих: Уста праведнаго поучатся премудрости, * и язык его возглаголет суд.

Святии вси земли Сибирския, * молитве Человеколюбца Бога, * да избавит нас * от всяких бед и напастей * и дарует нам живот вечный.

Слава, глас и подобен тойже:

Святителем похвала и священником слава, * правило монашествующим, мучеников веселие * и праведных радование вы есте, * святии вси, в земли Сибирстей просиявшии. * Молитесь ко Господу спастися душам нашим.

И ныне, глас тойже:

О Всепетая Мати, * умилосердися на моление наше, * Твое бо есмы достояние, * всех спаси и помилуй, * да Тя, вси роди, непрестанно величаем.

Тропарь Собора Сибирских святых, глас 3:

Церкве Христовы светильницы, * всяя России украшение, * святии вси, в земли Сибирстей просиявши, * Владыку всех молите * мир вселенней даровати * и душам нашим велию милость.

Слава, и ныне, Богородичен глас 3:

Тя ходатайствовавшую спасение рода нашего, * воспеваем, Богородице Дево: * плотию бо от Тебе восприятоу Сын Твой и Бог наш, * Крестом восприим страсть, * избави нас от тли, яко Человеколюбец.

НА ВЕЛИЦЕЙ ВЕЧЕРНИ

Поем Блажен муж: 1-й антифон, На Господи, воззвах: стихиры на 8, глас 8:

Да возвеселится днесь земля Сибирская, * наста бо пресветлый день памяти святителя и чудотворца Иоанна * и всех святых, в ней просиявших. * Да радуются насельницы сея страны, * имеюще святя и многоцелебныя мощи * славнаго угодника Божия. * Да возрадуются горы и холми, пустыни и долины сибирския, * восхваляющи Господа, давшего нам святых покровителей, * непрестанно молящихся о спасении душ наших.

Днесь светло красуется славный град Тобольск * Божественным сокровищем мощей твоих, святителю Иоанне, * и паства твоя, ликовствующи, радуется, * и православнии твоим просвещением, блаженне, хвалятся. * Ты же, отче наш Иоанне, с собором сибирских святых * моли Человеколюбца, Христа Бога нашего, * людем православным тишину даровати, * и земли плодородие, и велию милость.

Глас 1: Приидите, православных собори, * воспоем святителя Димитрия, архипастыря Сибири, * учением к Богоразумию нас наставльшаго, * источника чудес предивнаго, * церкви светильника пресветлаго * и всяя России прекрасное удобрение, * учителя Ростову премудраго. * Той бо избавляет нас от всяких искушений и бед, * со святителем Иоанном и всеми святыми, в Сибири просиявшими, * молится о душах наших.

Глас 2: Песньми священными восхвалим святители Христовы: * Иоанна, Филофея и Павла, * от Киевския Лавры благословение земли Сибирстей принесших * и светом Евангелия Христова просветивших ю, * тии бо со всеми святыми, в ней просиявшими, * молятся Господу спастися душам нашим.

Глас 3: Вы есте слава града Иркутска, * святителие Христовы Иннокентие, Софроние и Мелетие, * вы есте украшение Сибирския земли, * похвала Церкви Православныя, * в нейже процвели есте, яко крини благодатнии, * и возсияли, яко светильницы пресветлии, * со святителем Иоанном и со всеми святыми, в Сибири просиявшими, * молитесь ко Господу спастися душам нашим.

Глас 4: Днесь ликуют собори верных * в память твою, святителю Иннокентие, и велегласно вопиют: * ты, любве ради Христовы, страну свою оставив, * вселился еси на морских островах, * да просветиши светом Евангелия неведущих Христа, * идеже апостольски трудился еси. * Языческая племена крестив, * доброделанию их научил еси, * человеческия обычаи украсил еси, вопиющих ти: * радуйся, просветителю наш, * со всеми святыми, в Сибири просиявшими, * Господеви молися даровати душам нашим * мир и велию милость.

Глас 5: Да веселится Сибирская страна, * в нейже Господь яви угодника Своего, праведнаго Симеона, * близ града Верхотурья подвигом юродства Христа ради подвизавшагося, * защитника Православия и противников святя Церкви посрамителя, * скорого помощника в напастех и скорбех, * целителя верных и неверных. * Ты же, блаженне Симеоне, * со всеми святыми, в Сибири просиявшими, * молися о нас ко Господу, * даровати душам нашим мир и велию милость.

Глас 6: Божиим смотрением от града Ярославля в Мангазею пришедшаго * и за целомудрие от господина своего пострадавшаго, * Василия страсотерпца, первого мученика земли Сибирския почтим. * Той бо Престолу Божию с собором святых, в Сибири просиявших, предстоит * и молится о спасении душ наших.

Слава, глас 8:

Святителю Христов Иоанне, * хладныя Сибири молитвенниче, * града Тобольска стено неборимая, * Российския страны страже благодатный, * преподобных и праведных сопричастниче, святителей похвало, * не забуди чад твоих и со всеми святыми, в Сибири просиявшими, * молися Господеви даровати душам нашим велию милость.

И ныне, глас тойже:

Царь Небесный, за человеколюбие на земли явися, * и с человеки поживе: * от Девы бо Чистыя плоть приемый, * и из Нея прошедый с восприятием. * Един есть Сын, сугуб естеством, * но не Ипостасию. * Темже совершенна Того Бога и совершенна Человека * воистину проповедающе, * исповедуем Христа Бога нашего: * Егоже моли Мати Безневестная, * помиловатися душам нашим.

Вход. Прокимен дне и чтения три.

Пророчества Исаина чтение (глава 35):

Радуйся, пустыня жаждущая, да веселится пустыня и да цветет, яко крин. И процветет и возвеселится пустыня Иорданова, и слава Ливанова дадеся ей и честь Кармилова, и узрят людие Мои славу Господню и высоту Божию. Укрепитесь, руце ослабленныя и колена разслабленная, утешитесь, малодушнии умом, укрепитесь, не бойтесь: се Бог наш суд воздает и воздаст, Той приидет и спасет нас. Тогда отверзутся очи слепых и уши глухих услышат. Тогда скочит хромый, яко елень, и ясен будет язык гугнивых, яко проторжесе вода в пустыни и дебрь в земли жаждущей. И безводная будет во езера, и на жаждущей земли источник водный будет: тамо будет веселие птицам, и селитва трости, и лузи. И тамо будет путь чист, и путь свят наречется; и не преидет тамо нечистый, ниже будет тамо путь нечист, рассеянии же пойдут по нему и не заблудят. И не будет тамо льва, ни от зверей злых не взыдет нань, ниже обрящется тамо, но пойдут по нему избавлении. И собраннии Господем обратятся и приидут в Сион с радостию, и радость вечная над главою их. Над главою бо их хвала и веселие, и радость приимет я: отбеже болезнь, и печаль, и въздыхание.

Премудрости Соломоновы чтение (главы 5 и 6):

Праведницы во веки живут, и в Господе мзда их, и попечение их у Вышняго. Сего ради примут царствие благолепия и венец доброты от руки Господни, зане десницею покрывает я и мышцею защитит их. Приимет всеоружие рвение свое, и вооружит тварь в месть врагом. Облечется в броня правды, и возложит шлем – суд нелицемерен. Приимет щит непобедимый – преподобие, поострит же напрасный гнев во оружие, споборет же с ним мир на безумныя. Пойдут праволучныя стрелы молниины и, яко от благокругла лука облаков, на намерение полетят. И от каменометныя ярости исполнь падут грады, вознегодует на них вода морская, реки же потопят я нагло. Сопротив станет им дух силы и, яко вихор, развеет их, и опустошит всю землю беззаконие, и злодейство превратит престолы сильных.

Слышите убо, царие, и разумеите, навькните, судии концев земли. Внушите держащии множества и гордящиися о народах язык, яко дана есть от Господа держава вам и сила от Вышняго.

Премудрости Соломоновы чтение (главы 4, 6, 7 и 2):

Похваляему праведнику, возвеселятся людие. Безсмертие бо есть память его, яко от Господа познавается и от человек. И угодна Господеву душа его. Возлюбите убо, о мужие, мудрость и поживете; восхощите ея и наказани будете. Начало бо ея – любви и соблюдение закона. Почтите премудрость, да во веки царствуете. Возвещу вам и не скрью от вас таин Божиих, яко Той мудрости Наставник есть, и мудрых Исправитель, и всякому смыслу и делу Хитрец. И всем смыслом научит мудрость. Есть бо в ней Дух разумен и Свят, и сияние Света Присносущнаго, и образ благодати Божия. Та други Божия и пророки устроит. Благолепнейши же есть солнца и паче всякаго сотворения звезд, свету сосуждаема, обретается первейши. Та угождающая ей от болезни избави и настави на стези правыя. Даде им разум имети свят, и сохрани я от ловящих, и подвиг крепок подаде им. Да разумеют все, яко сильнейши всего есть благочестие и никогдаже преможет злоба мудрости, ниже преидет злыя, обличающа суд. Рекоша же в себе, помысливше неправедно: насильствуем праведному и не пощадим преподобства его, ни усраимся седин старости многолетны. Будет бо нам крепость закон, и уловим праведнаго, яко неугоден нам есть: и противится делом нашим, и поносит нам отпадение закона, и обличает нам согрешения наказания нашего. Возвещает нам разум имети Божий и отрока Господня себе именует. Бысть нам на обличение помышлением нашим и тяжек нам есть и видимь, яко неподобно иным житие Его и изменены стези Его: в поругание вменихомся Ему, и удаляется от путей наших, яко от нечистот, и блажит последняя праведных. Увидим убо, аще словеса Его истинна суть: искусим, яже сбываются Ему. Руганием и мукою истяжем Его, да разумеем кротость Его и искусим беззлобство Его: смертию безобразною осудим Его, будет бо посещение от словес Его. Сия помыслиша и прельстишася: ослепи бо я злоба их, и не разумеша таин Божиих, и не разсудиша, яко Ты еси Бог един, живота имей и смерти власть, и спасай во время скорби, и избавляй от всякаго зла. Щедр, и Милостив, и дая преподобным Своим благодать, и Своєю мышцею гордым противляся.

На литии стихира, глас 6:

Приидите, христоролюбивии людие, * суция в земли Сибирстей святыя восхвалим: * святителей Тобольских и всяя Сибири * Дмитрия, Иоанна, Филофея и Павла, * Иркутских иерархов Иннокентия, Софрония и Мелетия, * апостола Сибири святителя Иннокентия Московскаго, * святаго праведнаго Симеона Верхотурскаго и мученика Василия Мангазейскаго * и вкупе именуемыя и неименуемыя, * сии бо воистинну дела и словеса и многовидным житием соделашася святы, * ихже Бог чудеса прослави, * и ныне, прославльшему их Христу предстояще, * молятся прилежно о нас, * совершающих светлое их торжество.

Слава, глас 8:

Днесь наста солнца светлейший праздник * собора Сибирских святых, * верныя к веселию созывает * и лучами радости всех просвещает. * В них бо явися слава Христова, * слава Церкви Православныя, * дивными сияющи чудеса, * темже, вернии, любовию вопием: * молитесь о нас, святии вси, в Сибири просиявшии.

И ныне, глас тойже:

Да радуются радостию Божественною * насельницы Сибирския земли, * зряще теплую Заступницу, * дивную победу дарующу на противныя, * и да поют Божественными песньми.

На стиховне стихиры, глас 5.

Подобен: Радуйся:

Радуйтесь, святителие Христовы, * Сибирския страны хранителие, * молящимся крепкое упование, * болящих безмезднии целителие, * нищих питателие * и всем христианом мудрии наставницы. * Будьте всем нам заступницы неборимии * и о всем мире молитвенницы.

Стих: Честна пред Господем * смерть преподобных Его.

Радуйся, граде Тобольск, * такового сподобивыйся имети в себе святителя, * иже яко дар свыше от Бога даровася тебе, * и яко богатство неоскудное послася тебе, * и яко дражайшее сокровище вверися ти, * нетленные цельбоподательныя мощи святителя Иоанна, * апостольски в стране Сибирстей потрудившагося, * тьму нечестия от Тебе отгнавшего, * защитника и заступника твоего, * стеною молитв своих крепко тя ограждающего, * Богу о тебе предстательствующаго * и молящагося выну, * да приемлещи всегда велию милость.

Стих: Священницы Твои облечутся в правду, * и преподобнии Твои радостию возрадуются.

Радуйся, монашескаго жития светлый образе, * молитвенное правило, око недремлющее, * собеседниче Ангелов, пастырю учительный, * на стадо свое с Небесе взирающий, * святителю Иоанне, * с собором Сибирских святых молися Господеву * помиловатися душам нашим.

Слава, глас 8:

Днесь светло красуется славный град Тобольск * и чада Церкви Христовы радуются, * прославляюще собор Сибирских святых, * и ревностию ко спасению просвещаются, * взывающе: * молитвами, Господи, всех святых, в Сибири просиявших, * спаси души наша.

И ныне, Богородичен глас 8:

Безвестная Дево, * Яже Бога неизреченно зачещи плотию, * Мати Бога Вышняго, * Твоих рабов мольбы приими, Всенепорочная, * всем подающи очищение прегрешений: * ныне наша моления приемлющи, * моли спастися всем нам.

Тропарь Собора Сибирских святых, глас 3:

Церкви Христовы светильницы, * всяя России украшение, * святии вси, в земли Сибирстей просиявши, * Владыку всех молити * мир вселенней даровати * и душам нашим велию милость.

Слава, и ныне, Богородичен глас 3:

Тя ходатайствовавшую спасение рода нашего, * воспеваем, Богородице Дево: * плотию бо от Тебе восприятоу Сын Твой и Бог наш, * Крестом восприим страсть, * избави нас от тли, яко Человеколюбец.

НА УТРЕНИ

На Бог Господь: тропарь Собора Сибирских святых,

Церкве Христовы светильницы, * всяя России украшение, * святии вси, в земли Сибирстей просиявши, * Владыку всех молите * мир вселенней даровати * и душам нашим велию милость. [Дважды]

Слава, тропарь святителя Иоанна, глас 8:

Наставниче благочестия, * сиротствующих питателю, * скорбящих утешителю, * недугующих врачу безмездный, * душею страждущих скорый помощниче, * теплый молитвенниче о всех ко Господу, * святителю отче наш Иоанне, * моли Христа Бога спастися душам нашим.

И ныне, Богородичен, глас тойже:

Иже нас ради Рождейся от Девы, * и распятие претерпев, Благий, * испровергий смертию смерть, и Воскресение явлей, яко Бог, * не презри, яже создал еси рукою Твоею, * яви человеколюбие Твое, Милостиве, * приими Рождшую Тя Богородицу, молящуюся за ны, * и спаси, Спасе наш, люди отчаянные.

По 1-м стихословии седален, глас 6:

В памяти святых, в земли Сибирстей просиявших, вернии людие празднуют, * Небеса радуются и земли наша концы веселятся. * Тех молитвами даруй, Господи, душам нашим велию милость.

Слава, и ныне, Богородичен:

Слава на Небеси и на земли торжество, * яко Богородица со святыми, в земли Сибирстей просиявшими, * молится за вся ны к Сыну Своему и Богу нашему.

По 2-м стихословии седален, глас 2:

Равноангельно пожил еси, святителю Иоанне, на земли, * равное стояние имаши со Ангелы на Небеси. * Темже ты, яко человека Божия, ублажающе, * память твою и всех святых, в Сибири просиявших, совершаем радостно, * чающе от Христа Бога нашего улучшить мир и велию милость.

Слава, и ныне, Богородичен:

Се храм пресветел и место священия, идеже честная икона Матере Божия Слова, * приступите, человецы, и исцеление почерпите, * яко спасение Той ради даровася роду человеческому.

По полиелеи величание:

Величаем вас, * святии вси, в земли Сибирстей просиявши, * и чтим святую память вашу, * вы бо молите о нас * Христа Бога нашего.

Стих: Приидите, чада, послушайте мене, * страху Господню научу вас.

Величаем ты, * святителю отче наш Иоанне, * и чтим святую память твою, * ты бо молиши о нас * Христа Бога нашего.

Стих: Воззваша праведнии * и Господь услыша их.

Величаем вас, * святителю отче наш Иоанне * и вси святии, в земли Сибирстей просиявши, * и чтим святую память вашу, * вы бо молите о нас * Христа Бога нашего.

По полиелеи седален, глас 4:

Земля веселится и Небо радуется, отцы преподобнии, * восхваляюще подвиги и труды ваша, душевное благомощие и ума чистоту, * законом бо естества не победистеся, о соборе святой и полче Божественный.

Слава, и ныне, Богородичен:

Радуйся, Богородице Дево, * радуйся, похвало всей вселенной, * радуйся, Чистая Мати, Богу благословенная.

Таже степенна, 1-й антифон 4-го гласа.

Прокимен, глас 4: Честна пред Господем * смерть преподобных Его.

Стих: Что воздам Господеву о всех, яже воздаде ми?

Евангелие от Иоанна, зачало 36.

Рече Господь ко пришедшим к Нему иудеем: Аз есмь дверь, Мною аще кто внидет, спасется, и внидет, и изыдет, и пажить обрящет. Тать не приходит, разве да украдет, и убьет, и погубит, Аз приидох, да живот имут и лишше имут. Аз есмь пастырь добрый, пастырь добрый душу свою полагает за овцы. А наемник, иже несть пастырь, емуже не суть овцы своя, видит волка грядуща и оставляет овцы, и бегаєт, и волк расхитит их, и распудит овцы. А наемник бежит, яко наемник есть и не радит о овцах. Аз есмь пастырь добрый, и знаю Моя, и знают Мя Моя. Якоже знает Мя Отец, и Аз знаю Отца, и душу Мою полагаю за овцы. И ины овцы имам, яже не суть от двора сего, и тыя Ми подобает привести, и глас Мой услышат, и будет едино стадо, и един Пастырь.

По 50-м псалме стихира, глас 6:

Егда святыя мощи твоя * в соборную церковь Богоматере града Тобольска приносими бяху, * иерарси, священницы, иноцы и вси людие, ликующе, возрадовашася. * И ови убо, окружающе раку твою, удивляхуся нетлению твоему. * Овии же чудяхуся благоуханию твоему, от мощей твоих исходящему. * Инии же чудесная от Тебе бываемая прославляху. * Митрополит же Варфоломей со слезами вопияше ти: * о великий угодниче Божий, отче наш Иоанне! * Вижду ясно милость Божию, тобою явленную, и вопию: * слава Господу благоизволившему даровати Сибири таковое утешение. * Ты же, о святителю чудный, * со всем Собором Сибирских святых, * молися прилежно Христу Богу * спастися пастве твоей и стране нашей невредимой быти.

Канон всем святым, в Сибири просиявшим, егоже краегранесие: Собор Сибирских святых любовию благочестно восхваляем. Глас 1.

Песнь 1

Ирмос: Песнь победную поим вси Богу, * сотворшему дивная чудеса мышцею высокою * и спасшему Израиля, * яко прославися.

Припев: Все святии земли Сибирския, молитвe Бога о нас.

Слове Божий, помози нам достойно воспети Собор Сибирских святых, светом Евангелия Христова землю Сибирскую просветивших и всех научивших пети Тебе победную песнь, яко прославися.

Отрасль честная родителей твоих благочестивых Максима и Евфросинии был еси, отче Иоанне, книжному научению во граде Киеве ими определен и, преуспевая

мудростию, уразумел еси глаголы жизни вечныя, учителем и наставником подвизаяся, поучал еси всех воспевати Господеви песнь, яко прославися.

Благо есть мужу, егда возмет ярем в юности своей, глаголет Святое Писание. Сему последуя, с радостию иго Господне от юности восприял еси, блаженне Иоанне, родители, и вся, яже в мире, оставил еси, в Киево-Печерскую Лавру пришед, ангельский образ восприим, подвигом добрым подвизался еси, купно со иноки воспевая песнь Богу, яко прославися.

Отрок сый от града Ярославля в землю Сибирскую, в пределы Мангазеи пришед, идеже за целомудрие и благочестие от господина своего пострадав, венцем мученическим от Бога венчался еси, на земли нетлением прославился еси и чудеса. Престолу Господню с Собором Сибирских святых предстоя, первомучениче Сибирския страны, святе Василие, молися о нас, да вси воспоем песнь победную Христу Богу нашему, яко прославися.

Рода знатнаго и отечества твоего устранился еси, блаженне Симеоне, и манием Божиим возведен был еси в страну Сибирскую, идеже близ града Верхотурья подвизаяся, в швении одежда трудился еси во благо неимущим, помышляя одеяние души твоя, в немже да видиши в чертог Спасов, Емуже со всеми святыми, в Сибири просиявшими, победную песнь поеши, яко прославися.

Богородичен: Се время благоприятно, и день спасения, в немже знамение иконы Твоя, Пречистая, показася, еже празднующе, светло духовне торжество совершаем.

Катавасия: Отверзу уста моя:

Песнь 3

Ирмос: Да утвердится сердце мое в воли Твоей, Христе Боже, * Иже над водами небо утверждей второе * и основавый на водах землю, Всесильне.

Иерарси Христовы, Сибирския страны просветителие, со всеми святыми, в ней просиявшими, молитесь за ны ко Господу, да утвердятся сердца наша в воли Его, во еже подвигом добрым подвизатися, веру соблюсти и наследовати Царствие Небесное.

Братию Лавры умилял еси подвиги твоими, отче Иоанне, непрестанно проповедуя слово Божие, имже всех входящих поучал еси, да в Господе утвердятся сердца их, во еже благоугождати Христу Богу и творити святую волю Его.

Иоанне Богомудре, ты, имея любовь ко отечеству и Лавре, яко муж свят, добродетелию и мужеством украшен, аще и юн летами, в Великую Россию послан был еси защиты от нашествия турок просити, и не токмо помощь отечеству твоему в бедственное, воинских браней время, но и пристанище иноком Киево-Печерския Лавры получил еси, да в нем новопечерскую Свенскую обитель устроиши и научиши всех непрестанно славити Христа, Спаса душ наших.

Российский Златоусте, риторе изящнейший, православных архиереев удобрение, Церкви Тобольския и Ростовския украшение, благочестия светильниче пресветлый, святителю отче Димитрие, ты отгонял еси душевредных волков от Христовы ограды твоими богодухновенными учении, назирай и ныне, да не како суетумудрия возмутят тишину церковную, но паче моли Человеколюбца Бога, да едиными усты и единым сердцем восхвалим Его благоутробие.

Сохрани, святителю Димитрие, отечество твое ненаветно от врагов и даруй на сопротивных победу и одоление, да ты со всем Собором Сибирских святых песньми прославляем.

Богородичен: Кую Ти достойную похвалу наше принесет конечное неможение, яко явлением пречистыя Твоя Божественныя иконы независтныя источники целебныя источаеши верно прибегающим к Тебе рабом Твоим.

Кондак святителя Иоанна, глас 2:

Явился еси во тьме неведения пребывающим просветитель, * вдов и сирот утешитель, * дивный врач немощствующих, * младенцев и отроков наставник, * родителем же пресветлое радование, * святителю отче Иоанне, * моли Христа Бога подати стране нашей в вере утверждение, * воинству нашему на враги победу и одоление, * людем же своим велию милость.

Слава, седален Собора Сибирских святых, глас 4:

О всех славных, Церкви Святей благодатию Божию от вас бываемых, * благодарственная Богу воздающе * и Того боголепное низхождение славяще, * молим вас, святии вси, в Сибири просиявшии, * помозите и нам обрести благодать и милость в День Судный.

И ныне, Богородичен:

Под кров Твой, Владычице, вси земнороднии прибегающе, * вопием Ти, Богородице, упование наше: * избави ны от безмерных прегрешений и спаси души наша.

Песнь 4

Ирмос: Духом провидя, пророче Аввакуме, Словесе воплощение, * проповедал еси, вопия: * внегда приблизится лето – познаеши, * внегда приити времени – покажешися. * Слава силе Твоей, Господи.

Истиннии хранителие апостольских преданий, Духа облистующии зари, землю нашу осветивши сиянием добрых дел ваших, святии вси, в Сибири просиявшии, и нас научите пети: слава силе Твоей, Господи.

Храм Духа Святаго был еси, всеблаженне Иоанне, рукама своима приял еси узды правления обители Свенския и ко спасению подвигающихся в ней призывал еси, помышляя: яко венец без победы, победа без подвига, подвиг без брани, брань без врагов не бывает. И тако во обители четьренадесять лет подвизаяся, научил еси всех пети: слава силе Твоей, Господи.

Свенстей новопечерстей обители ревностно служа, Киево-Печерстей Лавре утверждение был еси, преподобне Иоанне, егда первую благословенную грамоту наместнику ея принесл еси, юже Патриарх Московский тебе вручи. Отселе и бысть начало присоединения митрополии Киевския к Москве, на радость Церкви Христовы, да вси, чада ея, едиными усты поют: слава силе Твоей, Господи.

Велия радости исполняются днесь людие Сибирстии, видяще, яко звезды, сияющия святыя своя, в нихже и святитель Филофей, в схиме Феодор, прославляется; благодатию Божию хранимый в опасности смертней, языческая кумирни со идолы их сокруши и научи всех пети: слава силе Твоей, Господи.

Яко конь храбрый, подобяся Павлу апостолу, спасительное еждение и богопроповедничество в суровом севере Сибири совершал еси, Богопросвещенне

Филофее, преемнику твоему святителю Иоанну в трудах сподвижник был еси и, по преставлении его Тобольскую митрополию паки восприим, храмы, школы просвещения и обители иноческия созидаю, течение свое совершил еси. Во обители Святыя Троицы града Тюмени телом почил еси, на небеси воспеваеши Богу: слава силе Твоей, Господи.

Богородичен: Теплая Заступнице к Тебе прибегающих и ненадеющихся надеждо, виждь скорбь людей Твоих и подаждь помощь, в знамении Твоем, Пречистая.

Песнь 5

Ирмос: Светлый нам возсияй Свет Присносущный, * утренюющим о судьбах заповедей Твоих, * Владыко Человеколюбче, Христе Боже наш.

Исцеления всем подаете, творящим память вашу, святии вси, в земли Сибирстей просиявшии. Молитесь за ны ко Господу, да возсияет и нам свет Свой присносущный, яко Человеколюбец.

Христос Господь чрез святителя Феодосия в Чернигов тя призывает, блаженне Иоанне, и архимандритом Елецкия обители поставляет, таже по кончине его и на высоту святительства возводит, да паству черниговскую упасеши и учением богословия обогатиши ю, во еже непрестанно славословити Господа Человеколюбца.

Любовь Божию тебе, святителю отче Иоанне, на одре смертном лежащу, святитель Феодосий являет и в чудном видении радостно вещает: не скорби, брате! Господь услыша молитву твою и ты будеши здрав, возстани от одра, готов буди служить Литургию Божественную, се знамение тебе. И бысть тако, да вси прославляют Господа, посетившаго тя человеколюбием Своим.

Юже от обуреваний Церковь Христову благовествованием истин Евангельских и святоотеческих преданий ревностно ограждая и паству Сибирскую мудре управляя, вся находящая ти скорби сладце терпел еси, святителю Павле, рассуждая реченное, яко недостойни суть страсти века сего к хотящей явиться в нас славе.

Божественным желанием о благолепии дому Божия горя, всеусердное попечение о просвещении паствы твоя имел еси, Богомудре святителю Павле; обретению мощей перваго архипастыря Иркутскаго споспешествуя, радовался еси. Столетие митрополии Тобольския завершив, в Киево-Печерскую Лавру, на место первых подвигов твоих, преселился еси, идеже телом нетленно почивая, от нощи неведения всех боговедением просвещаеши.

Богородичен: О Всенепорочная Дево, что Ти благодарение принесем? Яко светозарным явлением пречистыя Твоя иконы и Превечнаго Младенца, всех от неведения к свету богоразумия возвела еси.

Песнь 6

Ирмос: Пророка Иону подражая, вопию: * живот мой, Блаже, свободи из тли * и спаси мя, Спасе мира, зовуща: слава Тебе.

Вси в песнях духовных воспоим согласно в благочестии просиявшия, отцы наша, яже изнесе Сибирская страна и яже Церковь воспита. К нимже, могущим молитвами своими к Богу из глубины греховныя спасти нас, взываем: молите Человеколюбца Бога, да возведет от тли живот наш.

Истинен и верен страж Черниговския Церкви четырнадцать лет был еси, святителю Иоанне, попечение о всех имея. Об отечестве твоём ко Господу из глубины души молился еси и прозорливо Петру Первому на шведы победу предрек: предаст бо Господь Бог враги твои, сопротивляющиеся тебе, сокрушены пред лицом твоим. Яко сын отечества своего, воссоединению Малой России с Великою труды твои прилагал еси, благодарно воспевая Господа Человеколюбца.

Южный Российския земли предел оставив, воле Божией повинуюся, в хладную Сибирь пришел еси, святителю Иоанне, яко муж просвещен и благочестив, во благо Церкви Христовы на велия тяготы и жертвы себе вдал еси, да просветиши светом Христовым люди инородныя, имже благословение Лавры – икону Богоматере принесл еси, пред неюже за паству свою и весь мир молился еси Спасу мира, взывая: слава Тебе.

Благодать Божественная в тя вселися, святителю Иннокентие, апостол языков был еси, якоже и Павел. Темже восхищен был еси на высоту Божественнаго лицезрения, идеже молишися, да Бог возрастит, еже твоею рукою мудре насади и напои во граде Иркутске и в Сибирстей земли.

Любы николиже отпадает, глаголет Божественный Дух. Истина сия в чудесах любви твоя известия, святителю Христов Иннокентие, яко болящим исцеления и скорбящим утешение источаеши. Паствы иркутския украшение и земли Сибирския хранителю, монгольских языков просветителю, молися ко Господу, да спасет всех, яко Человеколюбец.

Богородичен: Абалатстей веси многобогатный дар и неистощимое сокровище даровал еси, знамение Матере Твоя, Слово, и Сия помощию и предстательством святителя Николая и преподобныя матере Марии Египетския противныя низлагаем.

Кондак, глас 3.

Подобен: Дева днесь:

Днесь Собор Сибирских святых предстоит в Церкви * и невидимо за ны молится Богу. * Ангели со архиереи славословят, * апостоли же с мученики ликовствуют, * святии вси Церкви Христовы радуются * и паства Сибирская веселится: * вси бо купно молят Превечнаго Бога.

Икос: Ангельски на земли поживших и со ангельскими чинми на Небеси ныне светло ликующих святых, в земли Сибирстей просиявших, песньми почтим: радуйтеся, святителие Нектарие, Димитрие, Иоанне, Филофее, Антоние, Павле, Варлааме и Филарете, града Тобольска и вся Сибирии просветителие. Радуйтеся, архипастыри Иркутстии Иннокентие, Мелетие, Софроние и Мелетие, земли Сибирския слава и украшение. Радуйся, Иннокентие, Сибирии и полунощных стран апостоле, указание пути в Царство Небесное, яко завещание, всем нам оставивый. Радуйся, Симеоне, Тобольское прозябение и паствы Смоленския святителю. Радуйся, Герасиме, из Иркутска в Астрахань на святительство призванный. Радуйся, Василие, великомучениче Мангазейский, цвете целомудрия и чистоты, землю Сибирскую кровию своею освятивый. Радуйтеся, преподобнии отцы Богоноснии Германе, Синесие, Макарие, Арефо, Варлааме, Андрее и Мисаиле, подвиги и молитвами вашими, яко звезды, тьму полунощных стран озарившии. Радуйтеся, праведнии Симеоне, Данииле, Стефане, Петре и Феодоре, манием Божиим в Сибирь пришедшии и святостию жития вашего ю просветившии. Радуйтеся, Христа ради

юродивии Иоанне, Космо и блаженная мати Домно, в Сибири подвизавшийся и Богу угодивший. Радуйтесь, угодницы Божии, явлении вси и неявиении, верою своею Бога прославивший и страдания своими милость Его обретший: вси бо вы молитесь о нас Превечнаго Бога.

Песнь 7

Ирмос: Пещь, Спасе, орошашеся, * отроцы же, ликующе, пояху: * отцев Боже, благословен еси.

Глас Евангельский услышавше, апостольскою ревностию к научению неверных языков устремишася, святии вси, в Сибири просиявши, землю сию подвиги своими освятивши, научите пети всех: Боже, благословен еси.

Отец сирот и вдов защитник, богатство нищих и болящих врач безмездный, старости жезла и научение юности, монашествующим добродетелей правило явился еси, святителю Иоанне, о пастве своей попечение всеусердное имея, поучал еси всех верных пети: благословен еси, Боже отец наших.

Четыре лета отечески паству Сибирскую окормляя, всем был еси вся, святителю Иоанне, святолепно пожив, от Господа сподоблен дара прозрения, время кончины своей провидя, Господеву предуготовал еси себе и пред образом Пречистыя Девы коленопреклонение преставися, восприял еси покой Бога благословеннаго.

Единством веры, надежды и любви союзом, от юности твоя в духовном просвещении душу твою утвердил еси, святителю Софроние, глас свыше в Золотоношестей обители Богоматере бысть тебе: егда будещи епископ, созижди храм во имя всех святых. Еже и исполни, внегда промыслом Божиим Иркутстей пастве апостольски служил еси, да и на месте первых подвигов твоих и в Сибирстей земле верныя прославляя тя, вопиют: отцев Боже, благословен еси.

Страхом Господним утверждаемь, терпением стяжал еси душу твою, святителю Софроние, путем тесным, единым ведущим в жизнь вечную, с Синесием преподобным, сподвижником твоим, шествовал еси, взирая на крестный путь Подвигоположника Христа. Научи и нас страху Господню, да, благочестно пожив на земли, сподобимся воспевати и на Небеси: благословен еси, Боже отец наших.

Богородичен: Тайна глубины рожества Твоего ум ангельский ужасает, Дево, и пречистая Твоя икона Казанская в Тобольске демоны прогонит, и лица нечестивых омрачает, и в студ поревает: не терпят бо взирати на силу ея, бегают же и исчезают. Мы же любезно покланяемся и Тя, Богородицу, величаем.

Песнь 8

Ирмос: Егоже ужасаются Ангели и вся воинства, * яко Творца и Господа, * пойте, священницы, прославите, отроцы, * благословите, людие, * и превозносите во вся веки.

Ныне время торжества, ныне радость духовная явися, возвеселимся убо, христоименитии людие, и Христу радостно воспоем: Твой мир даждь нам, да Тя, Безначальнаго Царя славы, хвалим и превозносим во вся веки.

О часе преставления твоего, святителю Иоанне, извести Господь и сподвижника твоего блаженнаго Филофея, в дальнем Кондинстем крае апостольское служение совершавшаго. Той бо, Божиим Духом водим, спутником своим возвести: брат наш Иоанн успе, преидем отсюда. И тако по шести месяцах пути возвратися во град

Тобольск и тело твое погребению предаде. Видя же его нетленным взываше: людие, Безначальнаго Царя славы Христа Бога пойте и превозносите во вся веки.

Отче всеблаженне Мелетие, апостольских учений верный подражателю и Евангельския истины в Сибирстей земли вкупе с преподобным Варлаамом Чикойским всеусерднейший глашатаю, Пастыреначальника Господа нашего Иисуса Христа верный служителю, моли Его даровати душам нашим мир и велию милость.

Смирение – охранительный меч, с ним безопасно пройдеши землю и ад и Неба достигнешь, – поучал еси спасающихся, святителю Мелетие, являя образ кротости житием своим. Апостольски в стране Сибирстей подвизался еси, от Иркутска до **Охотска**, на Курильских и Алеутских островах язычники просвещая. Конец же земнаго жития твоего пастве Харьковстей принесл еси, воспевая Безначальнаго Царя славы во вся веки.

Богородичен: Храм Тя Божий, Владычице, ведуще, во святем храме Твоем руки наша возносим на молитву: виждь озлобление наше и подаждь нам помощь.

Песнь 9

Ирмос: Живоприемный источник приснотекущий, * светоносный светильник благодати, * храм одушевленный, сень пречистую, * Небесе и земли пространнейшую, * Богородицу, вернии, величаем.

Воистинну ангел хранитель явился еси пастве твоей Сибирстей, любобожественне Иоанне, в годину бедствий и во вся дни отечески посещая ю. В залог любви твоея, яко милость Божию, святыя мощи твоя верным людем оставил еси, да вси, покланяющесе им, величают Христа Бога и Пренепорочную Матерь Его.

Аще и на Небеси пребываеши, обаче и земных не оставляеши, святителю Иоанне, мы же, чада твоя, любовию движимии, венец похвалы тебе приносим и с благословения Первосвятителя Российския Церкви в день памяти твоя собор Сибирских святых прославляем, Христа Бога и Пренепорочную Матерь Его величающе.

Любосмиренне Иннокентие, прозябение града Иркутска, ты и в подвиге твоем соименне апостолу Сибири, чудотворцу Иркутскому был еси, во славу Церкви и отечества твоего в просвещении Сибири и полунощных стран, якоже и преподобный Герман Аляскинский, трудился еси, поучая всех воспевати Христа и Пречистую Матерь Его.

Явление святости твоя, яко луч Божественный, возсия Церкви Христовей в наши дни, и слово наставления твоего о указании пути в Царство Небесное подвизает души наша ко спасению, святителю Иннокентие, в доме Живоначальныя Троицы, обители преподобнаго Сергия, телом почивая, ты светиши и Сибирстей земли, идеже со всеми святыми, в ней просиявшими, апостольски трудился еси, ныне же на Небеси восхваляеши Господа и Пресвятую Матерь Его.

Егоже возлюбили есте, Егоже возжелали есте, Егоже ради подвизались есте, святии вси, в земли Сибирстей просиявшии, молити Христа Бога, да мирное даст стояние Церкви Святей, отечеству нашему и всем людем земли и пробавит милость Свою почитающим память вашу.

Богородичен: Мати Всепетая, Владычице мира, умилосердися на моление наше, Твое бо есмы достояние. Всех спаси и помилуй, да Тя, вси роди, непрестанно величаем.

Светилен.

Подобен: Плотию уснув:

Плотию аще и почили есте, святии вси, в земли Сибирстей просиявши, * но духом живи есте, в Царствии Небеснем со Христом царствуете * и молитесь Ему о почитающих верою и любовию память вашу.

Слава, светилен святителю Иоанну:

Святитель Тобольский и молитвенник вся страны Сибирския * днесь Церковию прославляется, * яко мудрый управитель церковный, яко милосердия образ, яко святителей украшение.

И ныне, Богородичен:

Умири мир, Христе, мольбами Чистыя Богоотроковицы * и низложи вражия силы, * и тишину неизглаголанную устрой и во веки сохрани.

На хвалитех стихиры на 4, глас 8.

Подобен: О, преславнаго чудесе:

Вси помолимся Христу, * творяще память днесь святителя Иоанна, * и с ним вкупе воспоим * Собор Сибирских святых. * О коль велика Твоя милость к нам, * в Троице хвалимый Боже! * прими, Господи, молитвы всех святых, в Сибири просиявших, * и подаждь нам мир и велию милость.

О, преславнаго чудесе! * Пречестный храм Богоматере * града Тобольска, * якоже драгоценною утварию невеста, * украсися мощами святителя Иоанна. * О какво дарование, * Христе Боже, даровал еси нам, * яко един Милосерд.

О, преславнаго чудесе! * Светоносный и радостный праздник * Собора Сибирских святых * ныне нам возсия: * приидите, вернии, * в памяти их, веселящися, возопиим: * святии вси, молитесь за ны ко Господу, * да спасет души наша, яко Милосерд.

О, преславнаго чудесе! * Святитель Иоанн с Собором Сибирских святых * прославляется Господем, * Церковь Христова торжествует * и вси единомушно вопиют: * о Сибирския земли просветителие, * сохраните страну нашу * и всех нас от всякия нужды и печали.

Слава, глас 8:

Красуйся и веселися, граде Тобольск. * Радуйся и светло торжествуй, Церковь Божия; * се бо в тебе сокровище Божественных даров неоскудное явися— * нетленные мощи святителя Иоанна, * от нихже истекают исцеления и подается благодать * всем, с верою приходящим и чтущим любовию святую память его.

И ныне, Богородичен, глас тойже:

Владычице, прими молитвы раб Твоих * и избави нас * от всякия нужды и печали.

Славословие великое. И отпуст.

НА ЛИТУРГИИ

Блаженны, песни 3-я и 6-я.

Иерарси Христовы, Сибирския страны просветителие, со всеми святыми, в ней просиявшими, молитесь за ны ко Господу, да утвердятся сердца наша в воли Его, во еже подвигом добрым подвизатися, веру соблюсти и наследовати Царствие Небесное.

Братию Лавры умиляя еси подвиги твоими, отче Иоанне, непрестанно проповедуя слово Божие, имже всех приходящих поучал еси, да в Господе утвердятся сердца их, во еже благоугождати Христу Богу и творити святую волю Его.

Иоанне Богомудре, ты, имея любовь ко отечеству и Лавре, яко муж свят, добродетелию и мужеством украшен, аще и юн летами, в Великую Россию послан был еси защиты от нашествия турок просити, и не токмо помощь отечеству твоему в бедственное, воинских браней время, но и пристанище иноком Киево-Печерския Лавры получил еси, да в нем новопечерскую Свенскую обительстроиши и научиши всех непрестанно славити Христа, Спаса душ наших.

Российский Златоусте, риторе изящнейший, православных архиереев удобрение, Церкви Тобольския и Ростовския украшение, благочестия светильниче пресветлый, святителю отче Димитрие, ты отгоняя еси душевредных волков от Христовы ограды твоими богодухновенными учении, назирай и ныне, да не како суетудрия возмутят тишину церковную, но паче моли Человеколюбца Бога, да едиными усты и единым сердцем восхвалим Его благоутробие.

Вси в песнях духовных воспоим согласно в благочестии просиявшия, отцы наша, яже изнесе Сибирская страна и яже Церковь воспита. К нимже, могущим молитвами своими к Богу из глубины греховныя спасти нас, взываем: молитесь Человеколюбца Бога, да возведет от тли живот наш.

Истинен и верен страж Черниговския Церкви четырнадцать лет был еси, святителю Иоанне, попечение о всех имея. Об отечестве твоём ко Господу из глубины души молился еси и прозорливо Петру Первому на шведы победу предрек: предаст бо Господь Бог враги твоя, сопротивляющияся тебе, сокрушены пред лицом твоим. Яко сын отечествия своего, воссоединению Малой России с Великою труды твои прилагал еси, благодарно воспевая Господа Человеколюбца.

Слава: Южный Российския земли предел оставив, воле Божией повинуюся, в хладную Сибирь пришел еси, святителю Иоанне, яко муж просвещен и благочестив, во благо Церкви Христовы на велия тяготы и жертвы себе вдал еси, да просветиши светом Христовым люди инородныя, имже благословение Лавры – икону Богоматере принесл еси, пред неюже за паству свою и весь мир молился еси Спасу мира, взывая: слава Тебе.

И ныне: Богородичен: Абалатстей веси многобогатный дар и неистощимое сокровище даровал еси, знамение Матере Твоея, Слове, и Сия помощью и предстательством святителя Николая и преподобныя матере Марии Египетския противныя низлагаем.

По входе:

Тропар Собору Сибирских святых, глас 3:

Церкве Христовы светильницы, * всяя России украшение, * святии вси, в земли Сибирстей просиявши, * Владыку всех молите * мир вселенней даровати * и душам нашим велию милость.

Тропар святителю Иоанну, глас 8:

Наставниче благочестия, * сиротствующим питателю, * скорбящих утешителю, * недугующим врачу безмездный, * душею страждущих скорый помощниче, * теплый молитвенниче о всех ко Господу, * святителю отче наш Иоанне, * моли Христа Бога спастися душам нашим.

Слава ..., кондак Собору Сибирских святых, глас 3:

Днесь Собор Сибирских святых предстоит в Церкви * и невидимо за ны молится Богу. * Ангели со архиереи славословят, * апостоли же с мученики ликовствуют, * святии вси Церкве Христовы радуются * и паства Сибирская веселится: * вси бо купно молят Превечнаго Бога.

И ныне ..., кондак Богородице ради Ея иконы-Абалацкая. глас 4:

Честнаго образа Твоего знамение празднующе людие Твои, Богородительнице, * имже дивную победу на сопротивныя граду Твоему даровала еси. * Темже Тебе верою взываем: * радуйся, Дево, * христиан похвало.

Прокимен, глас 4: Дивен Бог во святых Своих, * Бог Израилев.

Стих: В церквах благословите Бога, Господа от источник Израилевых.

Апостол ко Евреем, зачало 335.

Братие, повинуйтеся наставником вашим и покаяйтесь, тии бо бдят о душах ваших, яко слово воздати хотяще, да с радостию сие творят, а не въздыхающе, несть бо полезно вам сие. Молитесь о нас, уповаем бо, яко добру совесть имамы, во всем, добре хотяще жити. Лишше же молю, сие творите, да вскоре устроюся вам. Бог же мира, возведый из мертвых Пастыря овцам великаго, кровию завета вечнаго, Господа нашего Иисуса Христа, да совершит вы во всяком деле блазе, сотворити волю Его, творя в вас благоугодное пред Ним, Иисус Христом. Емуже слава во веки веков. Аминь.

Аллилуия: Терпя потерпех Господа и внят ми * и услыша молитву мою.

Стих: Многи скорби праведным * и от всех их избавит я Господь.

Евангелие от Луки, зачало 24.

Во время оно, ста Иисус на месте равне, и народ ученик Его, и множество много людей от вся Иудей и Иерусалима, и помория Тирска и Сидонска, иже приидоша послушати Его и исцелитися от недуг своих, и страждущии от дух нечистых, и исцеляхуся. И весь народ искаше прикаться Ему, яко сила от Него исхождаше, и исцеляше вся. И той возвед очи свои на ученики своя, глаголаше: блажени нищии духом, яко ваше есть Царствие Божие. Блажени, алчущии ныне, яко насытитесь. Блажени, плачущии ныне, яко возсмеетесь. Блажени будете, егда возненавидят вас человецы, и егда разлучат вы и поносят, и пронесут имя ваше яко зло, Сына Человеческаго ради. Возрадуйтеся в той день и зыграйте, се бо мзда ваша многа на небеси.

Причастен: Радуйтеся, праведнии:

**МОЛИТВА СЯТТЕЛЮ ЮАННУ,
МИТРОПОЛИТУ ТОБОЛЬСКОМУ И ВСЕЯ СИБИРИ ЧУДОТВОРЦУ**

О сятителю Христов Иоанне, Божию престолу со сятыми предстоай, ты еси отец наш любвеобильный и молитвенник наш теплый; умоли Господа Бога, да подаст нам коегождо потребе полезная: скорбящим утешение, немощным здравие, заблудшия да наставит и обратит на путь покаяния, распри и раздоры умирит, неведущия Христа люди на путь спасения да обратит, и всех нас единением духа и любви в Единой Святей Своей Церкви соединит. Да сохранит нас от глада, града, труса, потопа, огня, меча, междоусобных брани и напрасных смерти, наипаче же от искушений, облежающих нас в жизни сей, да дарует нам мирное пожити зде житие и веру свою православную невредиму соблюсти. О сятый угодниче Христов, архипастырю предобрый, молитвенниче наш неусыпный! От юности всего себе Богу посвятив, равноангельное житие стяжал еси, исполнен бе радости духовных, яже озаряше светлость лика твоего и сердца верных утешаше. Поистине бе светильник горяй и светяй, святолепно пожив, от Господа сподоблен бе дара прозрения, время кончины своя предуведа, моляся пред образом Пречистой Богородицы коленопреклонение, преставися. Ныне проси Ю о нас, да будет нам Покровительница в сей многотрудней жизни и в час кончины наша да умолит Всеблагаго Господа сподобитися нам в лике благоугодивших предстати престолу Его и восхвалити в Троице славимаго Бога, Отца, и Сына, и Святаго Духа, и твое милостивое вкупе со всеми сятими, в земли Сибирстей просиявшими, предстательство, ныне, и присно, и во веки веков. Аминь.